

24/08/2003

Melayu perlu kikis sikap ambil mudah

KUALA LUMPUR: Orang Melayu perlu menghentikan sikap mengambil jalan mudah untuk mencapai sesuatu kejayaan dalam usaha dan perjuangan yang dilakukan, kata Datuk Seri Dr Mahathir Mohamad.

Perdana Menteri berkata, kemajuan dan kemunduran sesuatu bangsa bergantung kepada kesediaan mereka berpegang kepada nilai mulia dan amalan untuk menjayakan sesuatu usaha.

"Walaupun kita berpendapat, mendukung sesuatu nilai itu menjadi beban yang berat, sedangkan ada jalan mudah untuk mencapai kejayaan. Namun, hakikatnya, kita perlu bersabar. Agama Islam menyuruh kita bersabar.

"Semasa bersabar, kita perlu membuat persediaan, latihan mesti diadakan, ilmu mesti dikuasai. Sifat mengawal diri perlu ada supaya kita bertindak secara tersusun dan teratur serta membuat perancangan untuk mencapai matlamat.

"Bangsa yang tidak membuat perancangan tidak mungkin berjaya," katanya.

Dr Mahathir menyampaikan amanat itu kepada kira-kira 1,200 anak muda sempena Perhimpunan Anak Melayu Merdeka 2003 anjuran Sekretariat Melayu Muda di Pusat Dagangan Dunia Putra (PWTC), malam tadi.

Turut hadir Datin Seri Dr Siti Hasmah Mohamed Ali; Pengerusi Tenaga Nasional Berhad (TNB) Datuk Dr Awang Adek Hussin; Pengerusi Eksekutif Emkay Berhad, Tan Sri Mustapha Kamal Abu Bakar; Ketua Penerangan Umno, Tan Sri Megat Junid Megat Ayub dan Pengerusi Sekretariat Melayu Muda, Wan Azrain Wan Adnan.